

太上洞玄靈寶消禳火災經

爾時

靈寶天尊駕幸金仙壇上高德園中 齋會群仙 講說太上玄元無極至道 忽見下方世界 災火熾然 比屋連甍 化為炎燼 齋會既畢 萬神森衛 諸侍催班 風伯清塵 兩師灑道 隨從天尊 度至赤明天境 赤靈神君與諸火部神仙官屬 羅列威儀 獻百種異香 丹英紫芝 朱幡絳節 左右布肅 迎拜道前

天尊曰 汝等靈分三炁 位屬丹天 善惡攸專 行何賞罰 赤靈神君稽首奏曰 臣奉天命 職蒞火官 鑄育群生 長養萬物 歲或炎燎 災變所臨 氣運當然 無潛無忒 惟是隨其善惡 別以重輕 欲警愚民 亦行速報 凡有不敬天地三光者 有不孝不忠者 有欺曲升斗秤尺者 有惡倖情偽者 有加意無厭於小民者 有暴積橫取者 應一切為非不信報緣者 部有司察之神 遊行人間 並皆記錄 考驗得實 即奏行天罰 遣火部臨之 使之自新 知有省畏 為善種德者 飭諸神屬 不令侵犯 今日有幸 得覩天顏 願為此方 揄揚正教

太上洞玄靈寶消禳火災經

清微藏書閣

天尊曰 汝等威靈赫奕 號令嚴明 赤炁紅光 炎爍三界 吾於金仙壇上高德園中 見諸惡緣 故度此境 吾今為汝宣演神咒 將以流傳 於是若能改過遷善 信奉經教 有災之日 誦此咒者 汝等當為蠲除罪咎 令保安全 如遇分野之內 陽九應運 熒惑臨躔 能誦此咒者 汝等亦當救護 我必應時開宥 自然止息 如遇火精火怪 妄入人家 興諸禍殃 能誦此咒者 汝等亦當禁制 毋使害虐良民 即說咒曰

南方丹天	赤靈所專	威光烈焰	施化不偏
火龍一飛	照耀無邊	火馬一躍	萬里盤旋
火鷹一迅	鼓翼無前	火鈴一撼	洪音遠宣
火瓢一發	到處生煙	火劍一下	諸魔伏虔
火索一舉	百邪自纏	火旗一動	號令肅然
火節遙指	孰敢當權	盛德及物	長養生全
逆令反正	炎災灼天	鑒善不遺	削罪除愆
赤靈神君俯伏感謝	而作偈曰		
昔奉天尊教	察令守炎方		

今奉天尊敕 聞善降吉祥
家有天尊咒 火部不為殃
家有天尊咒 火勢息威光
家有天尊咒 火怪自潛藏
家有天尊咒 諸魔自滅亡
家有天尊咒 災厄自消禳
家有天尊咒 財物得阜昌
家有天尊咒 家宅保安康
作是偈已 惟見法駕縹緲
歸於玉京 赤靈神君與諸部屬
瞻仰天光 稽首奉送

太上洞玄靈寶消禳火災經竟

天運辛卯年酉月正一天師清微弟子洪鼎堅羅大英恭錄彙編

太上洞玄靈寶消禳火災經

清微藏書閣